

1Ioane **Ioane'a Mirihirote'e So'ağa Ibi'a** **Ihore Ġoe'a**

So'a 'ahi'e Ioane'a mirihiro. Ani'e Iesu tahi'a gaubanana aheu fare bo'ağano tahi'a 'ahoga. Ani'e ibite Iesu hari manoga zuni mirihiro. So'a 'ahi zamağano Iesu'e agağa huga zu Badi'a Ubuga rae fureranadu ani'e ġabofe'ete'e vazega rae ihoziro. Eme'e Badi'a zu Iesu zamare borofe'ena'a zega teite unihi'uma, ebu emege nabudi zuni zamare borofe'ena'a zega teite unihi'uma rae goeriro. Ġuriro ihore azağani'a Iesu'e ahirio mene ariro, rehano vineo da'o ariro rae ve'one ihozirote'e moneo zega ihore'e ve'oga rae fureniro.

Ġabone Zini'ete'e Ġoe'a

¹ Eme'a ġabone zini'ete'e ġoe'a moneo zae mazao rae furene'ohe. Ġoere a'e ġadaheğanono'o onao izidi radiu'ohe. Eme'a goere e'e igiro, ebu emege ubuma hina horoniro, zu ġianiro, ebu emege 'evore hina oboniro.

² Ġabone e'e'a fureraro. Eme'e ani horoniro ebu ani moneo rae furene'ohe, ebu ġabone tuğutuğu e'e moneo zae mazao haram'e'ohe. Ġabone tuğutuğu a'e Moga teite radiunu ebu emege mazao fureraro.

³ Zae zuni emege teite unihifine, eme emege'a nagini horonirote'e zu igirote'e zae mazao rae furene'ohe. Eme'a unihotite'eta'a'e Moga zu Ubuga, Iesu Keriso teite unihotite'ohe.

⁴ Emeḡe nidu'a tiburu matu'e rudanoga veize eme'a 'ahi mirihe'ohe.

Badi'a'e Agaḡa

⁵ Eme'a Iesuono'o egadu zae mazao rae furene'ete'e ḡoe'a'e 'ahi e'e. Badi'a'e agaḡa. Ani mazao'e uzabo o'o'a hune.

⁶ Eme'a, "Badi'a teite unihe'ohe," rae raena'a, 'ize uzabo zamaḡano radiune, eme ḡurire'ohe zu ḡoere hugano mene radiu'ohe.

⁷ Rehano Badi'a'a agaḡano radiu'ete'e teige, eme'a agaḡano radiune, eme'e unihotiti'uma zu ane Ubuga Iesu ruḡani'a haḡaife sau'a nidu'aono'o emeḡe vuzu'e dehefi'uma.

⁸ Eme'a haḡaife sau'a o'o'a rae reine, eme emeḡe'a bare so'ofe'ohe zu ḡoere hugano mene radiu'ohe.

⁹ Rehano eme'a haḡaife sau'a Badi'a mazao rae furenine, haḡaife sau'a rae modi'uma zu eme'a mene dudugano haḡairote'e haḡaiḡanono'o vuzu'e dehefi'uma. Mazaḡa ani'e zama nidu'a hina haḡae'ete'e zu haḡai duduga da'o haḡae'ete'e Badi'aḡa.

¹⁰ Badi'a'e, "Vaze nidu'a haḡai sau'a haḡae'ohe," rae ra'ohe. Rehano eme'a, "Haḡai sau'a mene haḡairo," rae reine, eme, "Badi'a'e ḡuriro Badi'aḡa," rae ra'ete'e heuga. Ebu ani ḡoere'e emeḡe zamao mene radiu'ohe.

2

Keriso'e Danafe'ete'e Vazeḡa

¹ Eḡe tahi'atahi'a, za haḡai sau'a mene haḡaifine eḡe'a zae veize 'ahi mirihe'ohe.

Rehano emeḡe bo'aḡano iniu'a haḡai sau'a haḡae'etene, emeḡe veize Moga mazao bire ḡoere'ete'e vazega 'ahoga'e emeḡe teite radiu'ohe. Ani'e vase duduḡa, Iesu Keriso.

² Ani'e emeḡe haḡai sau'a rae modifine ane bare dibu'iro. Mene emeḡe haḡai sau'a u'ano da'o, rehano haba'ahaba'a azaḡa nidu'a haḡaize sau'a u'ano 'ougiro.

³ Eme'a Badi'a goro ḡoe'a egohaune, eme'a ani edere'eta'a'e edere huni'uma.

⁴ Iniu'a, "E Badi'a edeḡa," rae raena'a, ane goro ḡoe'a mene egohaune, ani'e ḡuriro vazega zu ḡoere hugano mene radiu'ohe.

⁵ Rehano iniu'a Badi'a ḡoere egohaune, ani zamaḡa nidu'a hina hube hune Badi'a zamare borofe'ete'e ihoze'ohe. 'Ougadu eme'e Badi'a teite tiburanadu radiu'eta'a'e edere'ohe.

⁶ Iniu Badi'a teite tiburanadu radiu'ohe rae ra'ete'e vazega'e Iesu'a haḡairote'e teige haḡae'ena'a radi'uma.

Goro Ḡoe'a Iziga

⁷ Eḡe zamarone azaḡa, eḡe'a zae veize mirihe'eta'a'e mene goro ḡoe'a iziga, rehano a'e zae'a ibite Iesu mazao fie ḡadahenirote'e madaḡano meirote'e goroḡa ḡoe'a amahiḡa. Goro ḡoe'a amahiḡa'e zae'a igirote'e ḡoe'a.

⁸ Rehano e zae veize goro ḡoe'a iziga 'ahoga mirihe'ohe. Goro ḡoe'a 'ahi'e Keriso'a hugano hegote radiro, zu zae zuni hugano hegote radiu'ohe. Mazaḡa uzabo'e dauḡe'ohe ebu agaḡa huga'e amahi aradu agaru radiu'ohe.

⁹ Iniu'a, “E agaḡano radiu'ohe,” rae raena'a, ane negoḡa nabuga he'ehe'eze'ete'e vazega'e 'ize uzaboḡano radiu'ohe.

¹⁰ Iniu ane negoḡa nabuga zamare borofe'ete'e vazega'e agaḡano radiu'ohe, ebu ani mae bune'ete'e ḡauḡani 'ahoga'e o'o'a.

¹¹ Rehano iniu ane negoḡa nabuga he'ehe'eze'ete'e vazega'e uzaboḡano radiu'ohe ebu uzaboḡano ragave'ohe. Ani ane'a no'e oname'eta'a'e aḡu'a, mazaḡa uzabo'a ubumaḡa kuruniro.

¹² Tahi'atahi'a, e zae veize mirihe'ohe, mazaḡa Badi'a'a Keriso niḡano zae haḡai sau'a rae modiro.

¹³ Mama nidu'a, e zae veize mirihe'ohe, mazaḡa za'e ḡadaheḡanono'o radiu'ete'e vazega, Keriso edeḡa.

Tahi'a iziga, e zae veize mirihe'ohe, mazaḡa za'a sau'a ḡauḡa, Satani raharahaniro.

¹⁴ Tahi'atahi'a, e zae veize mirihe'ohe, mazaḡa za'e emeḡe Mama edeḡa.

Mama nidu'a, e zae veize mirihe'ohe, mazaḡa za'e ḡadaheḡanono'o radiu'ete'e vazega, Keriso edeḡa.

Tahi'a iziga, e zae veize mirihe'ohe, mazaḡa za'e inaraḡa, zu Badi'a ḡoere'e zae zamao radiu'ohe, zu za'a sau'a ḡauḡa, Satani raharahaniro.

¹⁵ Raha 'ahi ga raha ḡauḡa ago zamare borof'o'i. Iniu raha 'ahi zamare borofe'ete'e vazega'e Mama mene zamare borofe'ohe.

¹⁶ Mazaḡa raha ḡauḡa nidu'a'e Mama mazono'o mene are'ohe, rehano raha 'ahaono'o

are'ohe. Raha ġauġa'e ahiri ura haġaihi rae ra'ete'e zamaroneġa, zu ubuma hina horonadu haġai sau'a haġaihi rae ra'ete'e zamaroneġa, zu ze zeġe'a bare ma'ora azaġa rae niguze'ete'e ra'ohe.

¹⁷ Raha 'ahi zu raha azaġani'a urate'ete'e ġauġa nidu'a'e dauġe'ohe, rehano iniu Badi'a ura haġae'ete'e vazegħa'e radiu tuġutuġu.

Keriso Agire Azaġa

¹⁸ Tahi'atahi'a, izidi'e mada ġonaga. Za Keriso agire azaġani'a ari'uma rae igirote'e teige, ane agire azaġa ġehaġani'a aradu izidi radiu'ohe. E'e u'ano, eme izidi'e mada ġonaga rae edere'ohe.

¹⁹ Ze'a emeġe mazaono'o vaġiniro, mazaġa ze mene hube hune emeġe none azaġa reiro. Ze'e emeġe none azaġa reifone, emeġe teite radifo. Ze emeġe mazaono'o vaġinirote'e'a zeġe nidu'a'e mene emeġe none azaġa rae deheru ihofiro.

²⁰ Rehano zae'a Zaġoġa Vazeġaono'o Vine Zaġoġa meiro,* ebu zae nidu'a'e ġoere huga edere'ohe.

²¹ E zae veize mirihe'eta'a'e mene mazaġa za'e ġoere huga aġu'a. Za'e ġoere huga edeġa zu ġoere hukanono'o ġuriro'a mene fureru'eta'a'e edeġa. E'e u'ano, e 'ahi mirihe'ohe.

²² Ġuriro vazegħa'e iniu? A'e, "Iesu'e Keriso," rae ra'ete'e o'one'ete'e vazegħa! 'Uguġa vazegħa'e Keriso agire vazegħa, ebu Moga zu Ubuga o'oze'ohe.

* **2:20 2:20** *Zaġoġa Vazeġani'a zae vadinize rana dehoro be'uniro*

²³ Ubuga o'one'ete'e vazegā mazao Moga'e o'o'a. Ubuga mae ġihine'ete'e vazegā mazao Moga zuni e'e.

²⁴ Zae'a ġadaheġano igirote'e ġoe'a zamazeo obone gigano'i. Ġadaheġano igirote'e ġoe'a'e zamazeo radiune, zae zuni Ubuga ebu Moga teite tiburanadu radi'uma.

²⁵ A'e ani'a emeġe teite ġoitorirote'e ġoe'a ebu ġabone tuġutuġu.

²⁶ E iniu za so'ozadu tutuze ve'ozihī rae ra'ete'e azaġa moneo zae veize 'ahī mirihe'ohe.

²⁷ Za'e Keriso'a zinirote'e Vineġa Zaġoġa teite tiburanadu radiu'ohe. E'ano'o za vase 'ahogani'a za ihozoga veize mene umide'ohe. Vine Zaġoġani'a ġau nidu'a moneo za ihoze'ohe. Vine Zaġoġani'a nagini ihoze'eta'a'e huga zu mene ġuriro. Ane ihore idunaġano Keriso teite tiburanadu rado'i.

²⁸ E'ano'o, tahi'atahi'a, Keriso teite tiburanadu rado'i. 'Ougine, ani'a bare arine, ani ubumao mene riha'uma, ebu ani'a arite'e madaġano ani ubumao mene mazagarozī'uma.

²⁹ Za ani'e duduġa rae ederine, haġai duduġa haġae'ete'e azaġa nidu'a'e Badi'a ubugaubuga rae reirota'a'e ederi'uma.

3

Badi'a Ubugaubuga

¹ Emeġe Mama'a eme zamare borofe'ete'e moneo zamaro'i. Ani'a emeġe ufeta zamare'ete'e u'ano, eme'e ane ubugaubuga rae hufadu eme'e ane ubugaubuga rae ra'ohe. Raha azaġani'a Badi'a mene ederirote'e u'ano eme mene edeġa.

² Eḡe zamarone azaḡa, izidi eme'e Badi'a ubugaubuga. Zama moneo eme'e nouge reite'e 'ize mene deheru edere'ohe. Rehano eme edeḡa, Keriso'a raha 'adao arine eme'e ani teigi'uma, mazaḡa eme ani'e iniu rae huga horoni'uma.

³ Iesu'a arite'e horonoga guhine'ete'e azaḡa nidu'a'e Keriso'e deheḡa hune teige, ze zeḡe'a bare deheze'ohe.

⁴ Iniu haḡai sau'a haḡae'ete'e azaḡa nidu'a'e Badi'a goro ḡoe'a varade'ohe. Haḡai sau'a'e Badi'a goro ḡoe'a varade'ete'e ra'ohe.

⁵ Za Iesu'a haḡai sau'a mae vaḡinifine raha 'adao furerarota'a'e edeḡa. Ani mazao haḡai sau'a'e o'o'a.

⁶ Iniu ani teite tiburanadu radiu'ete'e vazega'e haḡai sau'a mene 'aune haḡae'ohe. Iniu haḡai sau'a 'aune haḡae'ete'e vazega'e Iesu mene horoniro zu mene ederiro.

⁷ Tahi'atahi'a, iniu'a za so'ozoga gararo'i. Keriso'e duduḡa teige, iniu haḡai duduḡa haḡae'ete'e vazega'e zuni Badi'a ubumao duduḡa.

⁸ Haḡai sau'a haḡae'ete'e vazega'e Diabolo mone vazega, mazaḡa Diabolo'e ḡadaheḡanono'o haḡai sau'a haḡae are'ohe. Diabolo gaḡa ruinoga veize Badi'a Ubugani'a ariro.

⁹ Badi'a ubugaubuga'e haḡai sau'a mene 'aune haḡae'ohe, mazaḡa Badi'a'a ḡabone iziga ezoneḡa zenadu ezone e'e'a zamazeo radiu'ohe. Ze haḡai sau'a 'aune haḡaoga'e mene idaḡa, mazaḡa ze'e Badi'a ubugaubugano reiro.

¹⁰ E'e u'ano, eme iniu'e Badi'a ubugaubuga, ebu iniu'e Diabolo ubugaubuga rae deheru

edere'ohe. Iniu haḡai duduḡa mene haḡae'ete'e zu negoḡa nabuga mene zamare borofe'ete'e vazega'e mene Badi'a ubuga.

Zamarotiti'i

¹¹ Eme zamarotiti'uma. A'e zae'a ḡadaheḡanono'o igirote'e ḡoe'a.

¹² Eme Kaino mene teigi'uma. Ani'e sau'a ḡauḡa, Satani mone vazega radu ane negoḡa maro. Nougadu ani'a negoḡa maro? Mazaḡa ane haḡai'e sau'a, u negoḡa haḡai'e Badi'a ubumao duduḡa.

¹³ Nego nabudi, raha azaḡani'a za he'ehe'ezo'idene, ago zaguzagano'i.

¹⁴ Eme'a runeono'o vaḡinadu ḡabone meirota'a'e eme edeḡa, mazaḡa emeḡe nego nabudi zamare borofe'ohe. Iniu negoḡa nabuga mene zamare borofe'ete'e vazega'e ruga.

¹⁵ Iniu ane negoḡa nabuga he'ehe'eze'ete'e vazega'e vase mau'ete'e vazega. Za'e edeḡa, vase mau'ete'e vazega mazao ḡabone tuḡutuḡu'e o'o'a.

¹⁶ Keriso'a emeḡe veize ḡaboneḡa aheti'ro. 'Ougadu eme'a nougenouge vase zamare borofe'eta'a'e ederiro. E'ano'o eme zuni nego nabudi veize ḡabonefe aheti'uma.

¹⁷ Raha toheḡa ḡehaḡa meirote'e vazega'ani'a negoḡa nabuga mazao ḡau 'ahoga fereze'ete'e horone'e rehano, mene vetuḡazeadu mene danazine, ani'e Badi'a zamare borofe'ohe rae re'umahe?

¹⁸ Tahi'atahi'a, eme hebe ga ḡoere hina da'o mene zamarotiti'uma, rehano haḡaife hina zu hugano zamarotiti'uma.

¹⁹ 'Ougine, eme emeḡe'a ḡoere huga hegote'eta'a'e ederi'uma, ebu Badi'a ubumao mene rihau'ena'a, zama roḡeḡano eda'uma.

²⁰ Emeḡe zama'a eme'e ve'oḡa rae reine zuni, eme mene riha'uma, mazaḡa Badi'a'e ḡihi'aḡa zu zamafe ufeta vitinoga. Ani'e ḡau nidu'a edere'ohe.

²¹ Eḡe zamarone azaḡa, emeḡe zama'a eme'e ve'oḡa rae mene reine, eme'e mene rihau'ena'a, Badi'a ubumao eda'uma.

²² Ebu eme'a nagini umide'ete'e ani mazaono'o hidi'uma, mazaḡa ane goro ḡoe'a egohau'ohe zu ani matu'ohau'ete'e haḡaiḡa haḡae'ohe.

²³ Ani goro ḡoe'a'e 'ahi e'e: Ane Ubuga Iesu Keriso mazao fi'uma ebu ani'a ḡoere riḡa ifirote'e teige, nego nabudi zamarotiti'uma.

²⁴ Iniu Keriso goro ḡoe'a egohau'ete'e azaḡa'e ani teite tiburanadu radiu'ohe zu ani'e zeḡe teite tiburanadu radiu'ohe. Keriso'a emeḡe teite tiburanadu radiu'eta'a'e ani'a rifirote'e Vineḡa Zaḡoḡa u'ano edere'ohe.

4

Vine Zaḡoḡa zu Ḡuriro Viga

¹ Eḡe zamarone azaḡa, “Badi'a Vine'e eḡe mazao,” rae ra'ete'e azaḡa nidu'a ago mae ḡihizo'i. Zeḡe ḡoere'e Badi'a Vineono'o ga mene'e ederifine tuhuzo'i. Mazaḡa ḡuriro peroveta azaḡa ḡehaḡani'a raha 'adao fureraro.

² Badi'a Vine'e iniu mazao radiu'eta'a'e 'ahige ederi'uma: Iniu Iesu Keriso'a ahirio arirote'e mae ḡihine'ete'e azaḡa nidu'a'e Badi'a Vine'e zeḡe mazao radiu'ohe.

³ Rehano Iesu mene mae ġihine'ete'e vazegā mazao Badi'a Vine'e o'o'a. 'Uguġa vazegā vine'e Keriso agirohau'ohe. Za'e Keriso agirohau'ete'e vigani'a arite'e igiro. A'e amahi aradu izidi raha 'adao radiu'ohe.

⁴ Tahi'atahi'a, za'e Badi'a mone azaġa, ebu ġuriro peroveta azaġa raharahaziro. Mazaġa zae teite tiburanadu ġabode radiu'ete'e Badi'aġa Viga'e raha 'adi viga ufeta vitine ġihi'aġa.

⁵ Ġuriro peroveta azaġa'e raha mone azaġa, e'ano'o raha ġauġa moneo ġoere'ohe zu raha azaġani'a zeġe ġoere igi'ohe.

⁶ Rehano eme'e Badi'a mone azaġa. Iniu Badi'a edere'ete'e vazegā'e emeġe ġoere igi'ohe. Rehano Badi'a mene mone vazegā'e emeġe ġoere mene igi'ohe. E'ano'o eme edeġa, nagini'e ġoere huga ihofe'ete'e Viga zu nagini'e ġuriro viga.

Badi'a'a Eme Zamare Borofe'ete'e teige Zamarotito'i

⁷ Eġe zamarone azaġa, eme zamarotitih, mazaġa Badi'a'a danafadu eme zamarotitoga'e idaġa. Vaze zamare borofe'ete'e azaġa nidu'a'e Badi'a ubugaubuga, ebu Badi'a edeġa.

⁸ Vaze mene zamare borofe'ete'e vazegā'e Badi'a aġu'a, mazaġa Badi'a'e vaze zamare borofe'ete'e Badi'aġa.

⁹ Badi'a'a eme zamare borofe'ete'e emeġe mazao 'ahige fureniro: Ani'a ane Ubuga tibuhuga raha 'adao tuġuniro. Ubuga u'ano, eme'e ġabode radiu'ohe.

¹⁰ Zamarone huga'e 'ahi e'e: Eme'e Badi'a mene zamare borofiro, rehano Badi'a'a emeġe

zamare borofiro, ebu emeḡe haḡai sau'a rae modadu ḡabofoga veize ane Ubuga tuḡunadu dibu'iro.

¹¹ Eḡe zamarone azaḡa, Badi'a'a eme 'ouge ufeta zamare borofiro 'ahine, eme zuni zamrotiti'uma.

¹² Vazeni 'ahogani'a Badi'a mene horoniro. Rehano eme'a zamrotite'ete'ea Badi'a'a emeḡe teite tiburanadu radiu'ohe. Ebu Badi'a'a emeḡe zamare borofe'ete'e teige, eme'a zamafe nidu'a hina hube hune vase zamare borofoga'e idaḡa.

¹³ Eme edeḡa, Badi'a'a ane Vine rifrote'e u'ano, eme'e Badi'a teite tiburanadu radiu'ohe zu ani'e emeḡe teite tiburanadu radiu'ohe.

¹⁴ Mogani'a ane Ubuga'e raha azaḡa ḡabozite'e vazeḡano reifine tuḡuniro. Eme e'e horoniro zu rae furene'ohe.

¹⁵ Iniu'a Iesu'e Badi'a Ubuga rae mae ḡihine'ete'e vazeḡa teite Badi'a'a tiburanadu radiu'ohe, zu ani'e Badi'a teite tiburanadu radiu'ohe.

¹⁶ Eme'e Badi'a'a emeḡe zamare borofe'eta'a'e edere'ohe zu mae ḡihine'ohe.

Badi'a'e vase zamare borofe'ete'e Badi'aḡa. Iniu vase zamare borofe'ena'a, radiu'ete'e vazeḡa'e Badi'a teite tiburanadu radiu'ohe, zu Badi'a'a ani teite tiburanadu radiu'ohe.

¹⁷ Eme'a zamrotite'ete'e ibiḡano, zamafe nidu'a hina hube hune vase zamare borofoga'e idaḡa. 'Ougadu Badi'a kota madaḡano eme'e mene rihau'ena'a, ani ubumao eda'uma, mazaḡa Iesu'a haḡairote'e teige eme zuni raha 'adao 'ouge haḡae radiu'ohe.

¹⁸ Eme'a Badi'a zamare borofadu ani mene rihone'ohe. Hube hune ani zamare borofadu riho mae vaġine'ohe. Vaze'a ani mazaono'o aduga hidi'uma radu rihau'ohe. Rihau'ete'e vazegā'e zamaġa nidu'a hina Badi'a hube hune mene zamare'ohe.

¹⁹ Badi'a'a ibite geno emeġe zamare borofiro 'ahine, eme Badi'a zu vase zamare borofe'ohe.

²⁰ Vaze 'ahogani'a, "E Badi'a zamare borofe'ohe," rae raena'a, ane negoġa nabuga he'ehe'ezine, ani'e ġuriro vazegā. Horoze'ete'e negoġa nabuga mene zamare borofe'ete'e vazegā'e mene horone'ete'e Badi'aġa zamare borofoga mene idaġa.

²¹ Eme'a Badi'a mazaono'o meirote'e goroġa ġoe'a'e 'ahi e'e: Iniu'a Badi'a zamare borofe'ete'e vazegā'e ane negoġa nabuga zuni zamare borofi'uma.

5

Iesu'e Badi'a Ubuga rae mae Ġihine'ete'e Azaġa

¹ Iniu Iesu'e Keriso rae mae ġihine'ete'e azaġa nidu'a'e Badi'a ubugaubuga. Iniu moga zamare borofe'ete'e vazegā'e moga ubuga zuni zamare borofe'ohe.

² Eme Badi'a zamare borofe'etene zu ane goro ġoe'a egohau'etene, eme'a Badi'a ubugaubuga zamare borofe'eta'a'e edeġa.

³ Badi'a zamare borofe'ete'e ibiġa'e ane goro ġoe'a egohau'ete'e ra'ohe. Ane goro ġoe'a egohanoga'e mene riġa.

⁴ Badi'a ubuga nidu'a'e raha gāuḡa raharahane'ohe. Eme'a fie'ete'e u'ano, eme'e raha gāuḡa raharahane'ohe.

⁵ Raha gāuḡa raharahane'ete'e vazegā'e iniu? A'e, "Iesu'e Badi'a Ubuga," rae mae ḡihine'ete'e vazegā da'o.

Iesu Keriso'e Badi'a Ubuga rae Fureniro

⁶ Iesu Keriso'e vu zu ru hina arirote'e vazegā. Ani'e vu hina babatiso meiro zu ruḡa be'unadu rudaro. Ani'e mene vu hina da'o ariro, rehano vu zu ru hina ariro. Ebu Vine Zaḡoḡani'a ani'e Badi'a Ubuga rae furene'ohe, mazaḡa Vine Zaḡoḡa'e hugano ḡoere'ohe.

⁷ Iesu'e Badi'a Ubuga rae furene'ete'e gāuḡa'e uḡidu.

⁸ A'e, Vine Zaḡoḡa zu vu ebu ru. Uḡidu a'e Iesu moneo ḡoere idane rae furene'ohe.

⁹ Eme vazē'a rae furene'ete'e ḡoe'a mae ḡihine'ohe. Rehano Badi'a'a rae furene'ete'e ḡoe'a'e ufeta ḡihi'aḡa. Badi'a'a ane Ubuga moneo rae fureniro.

¹⁰ Iniu Badi'a Ubuga mazao fie'ete'e vazegā'e Badi'a'a rae furenirote'e ḡoe'a ane zamao e'e. Iniu Badi'a mazao mene fie'ete'e vazegā'e, "Badi'a'e ḡuriro Badi'aḡa," rae huniro, mazaḡa ani Badi'a'a ane Ubuga moneo rae furenirote'e ḡoe'a mene mae ḡihiniro.

¹¹ Badi'a'a rae furenirota'a'e 'ahi e'e: Ani'a ḡabone tuḡutuḡu rifiro ebu e'e ḡaboneḡa'e ane Ubuga zamaḡano radiu'ohe.

¹² Iniu Ubuga mae ġihine'ete'e vazegħa'e ġaboneġeta, u iniu Badi'a Ubuga mene mae ġihine'ete'e vazegħa mazao'e ġabone o'o'a.

Ġabone Tuġutuġu

¹³ Za'e Badi'a Ubuga mazao fie'ete'e azaġa. E zae veize 'ahi miriħe'ohe. Ġabone tuġutuġu zae'a meirota'a'e zae'a ederifine so'a 'ahi miriħe'ohe.

¹⁴ Eme'a mene rihau'ena'a, Badi'a vaġe oname'ohe. Mazaġa ani urao eme'a nagini umidine ani'a emeġe uminone igi'uma rae edere hune'ohe.

¹⁵ Eme'a nagini umide'ete'e Badi'a'a igi'ohe. E'e ederine, ani mazao nagini umidirote'e eme'a hidite'e zuni ederi'uma.

¹⁶ Iniu negoġani'a haġai sau'a haġae'ete'e horone'etene, haġai sau'a e'e'a ani runeo mene tutuni'uma rae ro'idene, Badi'a mazao kurano'i. 'Ougine, Badi'a'a runeo tutuze'ete'e haġaiġa sau'a mene haġae'ete'e azaġa ġabozi'uma. U runeo tutuze'ete'e haġaiġa sau'a'e e'e. E haġai sau'a 'uguġa u'ano kurano'i rae mene ra'ohe.

¹⁷ Haġai ve'oġa nidu'a'e haġai sau'a. Rehano runeo mene tutuze'ete'e haġaiġa sau'a zuni e'e.

¹⁸ Eme edeġa, Badi'a ubuga nidu'a'e haġai sau'a mene 'aune haġae'ohe. Badi'a Ubugani'a ze bire'ete'e u'ano sau'a ġauġa, Satani'a ze sausauzoga'e mene idaġa.

¹⁹ Eme edeġa, eme'e Badi'a ubugaubuga ebu raha 'ahi nidu'a'e sau'a ġauġa Satani'a zuhi'azi'ohe.

²⁰ Zuni eme edeġa, Badi'a Ubuga'e aradu zamarone manoġa rifiro. 'Ougadu emeġe'a

Badi'a huga edere'ohe. Eme'e Badi'a huga teite tiburanadu radiu'ohe ebu Ubuga Iesu Keriso teite zuni tiburanadu radiu'ohe. Keriso'e Badi'a huga zu ġabone tuġutuġu.

²¹ Tah'i'atahi'a, ġuriro badi'aġa mazaono'o vaġino'i.

Buka Zaḡoḡa Ġoitore Iziga
The New Testament in the Uare language of Papua
New Guinea

Nupela Testamen long tokples Uare long Niugini

copyright © 2017-2024 Wycliffe Bible Translators, Inc.

Language: Uare

Translation by: Wycliffe Bible Translators

Contributor: Global Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-08-11

PDF generated using Haiola and XeLaTeX on 11 Aug 2025 from source files dated 11 Aug 2025

c398f744-e34b-525a-a9fe-d04e84ab7b13